

COMUNICÂT STAMPE

RAI: SPECIÂL "SUNS 2012"

DOMENIE AI 16 DI DICEMBAR IL SPECIÂL DI CLAUDIA BRUGNETTA DEDICÂT AL FESTIVAL MUSICÂL TES LENGHIS DI MINORANCE

Udin, ai 14 di Dicembar 2012 - Musichis e lenghis di dute Europe a dan vite ogni an a Udin al Festival de cjançon in lenghe minoritarie SUNS.

Nassût tal 2009 tant che progjet strategjic de ARLeF-Agjenzie regjonâl pe lenghe furlane cu la organizazion des cooperativis Il Campo e Informazione Friulana, SUNS al è cressût cul timp tai numars e te partecipazion. Te cuarte edizion, davuelte al Palamostre a Novembar, a son stâts premiâts i doi artiscj algherês Claudia Crabuzza e Claudio Gabriel Sanna che, cui furlans Jonokognos (premi dal public), a àn partecipât ae finâl dal plui grant festival european di setôr, il Liet International.

Lis imagjinis dal concerti, lis intervistis ai protagoniscj, lis testimoniancis dai vincidôrs, il backstage e lis curiositâts su musiche e lenghis europeanis mancul pandudis si podaran gjoldi domenie ai 16 di Dicembar su RaiTre aes 10.15 (cun repliche in prime serade su RaiTre Bis a Zenâr 2013) tal speciâl di mieze ore "Liet Festival Suns 2012" pe regjie di Claudia Brugnetta.

Si scoltaran dutis lis cjançons dai artiscj in gare - i doi "di cjase", ven a stâi il grup rock codroipês Jonokognos e il zovin cuintet punk cjargnel dai Mig 29 over Disneyland, plui il cjantautôr francprovenzâl Billy Fumey; il grup rock-eletronico dai Cha Da Fö (romanç dai Grisons); il cjantautôr ladin Jean Ruaz; il rapper sart Randagiu Sardu; il rock pop de minorance cravuate dal Burgenland in Austrie interpretât di Ruben Dimitri e il folk acustic de Ocitanie francese dai Somi de Granadas - ma, in plui, Brugnetta e à dedicât la sigle finâl ae performance dal ospit di onôr, ven a stâi chês di Jens L. Thomsen, cetant origjinâl fondadôr dal grup dai Orka, formazion che e rive des lontanis isulis danesis Fær Øer, e che a à puartât a Udin melodiis cence timp e cence spazi interpretadis di une vôs profonde, cun struments che si son costruîts di bessôi e musiche eletroniche.